

CARTA NU GUTHEL·LA' APÓSTOL SAN PABLO PARA CA ENNE' FILIPOS

La Epístola Del Apóstol San Pablo A Los

FILIPENSES

1 Inte' Pablo lani Timoteo ná tu' huenitsina qui' Cristo Jesús, rudiani tu' iyaba lebi'i hermanos canu tse'e le' ciudad Filipos tsa'tsela tehua ca dirigente qui' iglesia nna ca diácono nna, iyaba adí canu chì ná enne' qui' Tata Dios ttuba lani Cristo Jesús. ²Dios Padre qui' ri'ua nna gunie le bendecir lani adí favor quì'e a'hua lani la' ÿeni nu runna Jesucristua enne' née Señor lo iyate.

³Yala gracia ruí'a' Tata Dios qui'ya'a de rexa látsa'a' lebi'i.

⁴Canchu chì runia' oración nna, siémpreni rinábania' Tata Dios por iyaba lebi'i lani la' redacca'latsi',

⁵porqui'ni runi le inte' cualani desdeba primero tsá huía latsi' le hastaba annana, a' modo nna ttuba runi ri'u duel·la' para qui'ni iyaba ca enne' guna cã titsa' nu runna salvación. ⁶Confianza nu rappa' nna ná qui'ni Tata Dios enne' gudulúe tsina tsè' quì'e lo losto' le nna guni bée na seguir hasta qui'ni ccá le completamente tì'a calatsi'e

canchu í'yu tsá íl·lani Jesucristua attu. ⁷Tsè'ba ná rulaba látsa'a' anía nu cca qui' iyaba le, porqui'ni yala estimar runia' iyaba le, pues ttuba ridi' ri'u ca bendición nu runna Tata Dios. Ttuba ná ri'u tulidà taá sea canchu chì tì'a' litsi' ìyya o canchu chì dua' ru'a lo ca uxticia runia' discutir lani cã a favor de tìtsa' de salvación nna repa'a ya' cã qui'ni ná titsa' lí. ⁸Tata Dios nna hua yù bée qui'ni yala calátsa'a' ilá' te' le attu vuelta porqui'ni té la' tsi'ilatsi' quia' lani lebi'i nu runna Jesucristua lo lostu'a'. ⁹Oración qui' por lebi'i nna ná qui'ni gata' adí la' tsi'ilatsi' lo losto' le tulidàba, a'hua qui'ni gata' hua qui' le adí la' riyeni tsè' nna a'hua la' huacca para ttelini le iyaba ca cosa espiritual. ¹⁰A' rinába'a' para qui'ni ttelini le nu ru'u latsi' Tata Dios qui'ni guni le. Anía modo nna tsé'e le lani ttu la' labani nàri, a'hua labi biya falta ni etsèla contra le canchu chì í'yu tsá íl·lani Cristua attu. ¹¹Rinába'a' nui para qui'ni

ilá'ní qui'ni ná le creyente tsittsì de runi le nu ná tsè' por medio de la' huacca qui' Jesucristua. Laniana de rilá'ni ca enne' le nna, entonces gudàliani cą Tata Dios nna ina cą qui'ni née enne' té iŷeni la' huacca qui'e.

¹²Hermanos, calátsa'a' ccá le saber qui'ni iyaba nu beni cą contra inte', pues ná ttu oportunidad para qui'ni ca enne' nna guna cą titsa' nu runna salvación. ¹³Porqui'ni hasta iyaba ca soldado tse'e le' paláciuj, ą'hua adí ca enne' huaya' nna chì runna cą nu cca qui' Cristua nna yù cą qui'ni tí'a' litsi' iyyi porqui'ni runi ye' e servir. ¹⁴De yù ca hermanos nì qui'ni runia' predicar titsa' qui' Cristua masqui'ba tí'a' preso, pues casi iyaba cabi chì hua rappa cabi confianza lani Señor qui'ni guni huée cabi cualani, acca riquixá'a hua cabi lani valor ni titsa' qui'e. ¹⁵⁻¹⁷Tse'e ttu te cą nna runi cą predicar nu cca qui' Cristua, pero runi cą na porqui'ni rappa cą la' yélati' lani inte' nna, pues pleito ba rila cą lani intu', nna riquixá'a cą lani interés porqui'ni reyila cą motivo contra inte' nna rulaba latsi' qui' qui'ni ą' modo nna ccá' adí padecer le' litsi' iyyi. Pero attu te ca hermanos nna lani la' redacca'latsi' runi cabi predicar, porqui'ni yala catsi'ini cą Cristua nna yù cą qui'ni nì ba tí'a' para gunia' discutir lani ca enne' a favor de titsa' de salvación nu runi Cristua ofrecer. ¹⁸Pero bihua dacca' gunia', pues masqui'ba lani la' yélati' runi cą predicar o lani ituba latsi' qui' le, pero riquixá'a dihua cą nu cca qui' Cristua, acca por nù nna yala

redacca' ba te'. ¹⁹Ą'hua adírula chì edacca' la te' porqui'ni yùli rània' qui'ni por medio de ca oración qui' le, ą'hua por cualani qui' Espírиту Santo nna, tál'liá la' tsè' para inte'. ²⁰Pero nu ccá ba látsa'a' ą'hua deseo nu té ba lo lóstu'a' nna es qui'ni bittu eyà'na málua' lani deber nu té quia' lani Cristua, sino qui'ni gunia' seguir ínnia' lani valor taá por lee, para qui'ni annana tì'a antes nna gulue'ní le' la' labani quia' qui'ni Cristua nna hua lígani yala enne' de la' huacca née para inte', ya sea canchu cabania' o canchu gattia' l'e. ²¹Miéntaste bania' nna Cristua nna née iyábani para inte', ą'hua canchu gattia' nna adí telani tsè' ccá para inte'. ²²Pero canchu guni ba' seguir ccabania' le' yésiloyuj nna tsè'ba ną para gunia' adí tsina qui' Señor nna thí' ca enne' adí bendición qui' qui', acca labi yua' bíŷala nù gucuí'a', ²³pues yala tabi ná para inte' gucuí'a' entre chuppa ca ca cosj, por ejemplo: adí rú'u látsa'a' gattia' para etsina' xia' ŷiabara' nna thúa' lani Cristua, pues adítela tsè' ccá para inte'. ²⁴Pero yala ná duel'la' qui'ni ccabania' áttu chúppa tsá, pues yúa' qui'ni adírula riquina'ni le inte'. ²⁵De ga'na' seguro qui'ni yala riquina'ni le inte' nna acca yua' qui'ni eyà'na ba' le' yésiloyuj. Guni ba' seguir ccabania' para thúa' lani le nna gunna' adí fuerza para espírиту qui' le nna gata' adí la' redacca' latsi' lo losto' le de chì ría latsi' le Cristua. ²⁶Laniana yala conforme egà'na le nna hue' le gracia Cristo Jesús porqui'ni itá' attu tanél'lia' le. ²⁷Pero biŷa tediba

ttí'a', pues dani le guni le nu ná tsè' tulidàba para qui'ni la' labani qui' le nna ccá ti'ba rulue' evangelio qui' Cristua, para qui'ni canchu itá' tanél-lia' le nna ilá' te' qui'ni lebi'ì nna hua runi ba le seguir tsittsì, à'hua qui'ni tse'e ba le ttuba de runi le discutir lani ca enne' a favor de ca enseñanza nu rulue' lo titsa' de salvación nu ría latsi' le. À'hua canchu re' ba' idittu' l-le nna cahua látsa'a' iyesi te' qui'ni anía runi le seguir, ²⁸sin la' ratsilatsi' de ruthacca' ca contrario qui' le le. Claru taá rulue'ní qui'ni por iyaba mal nu runi cã nna, seguro ba nitti ba cã, pero para lebi'ì nna rulue' la qui'ni chî té salvación qui' le. Tata Dios enni'ã' runi nùì para lebi'ì. ²⁹Ti'ba chî beni Tata Dios para tsía latsi' le Jesucristua, à'hua chî runie para thí' le adí ca bendición de cca le sufrir por nu cca qui'e. ³⁰Lebi'ì lani inte' nna ttuba rútsa'lo ri'u batalla espiritual, pues hua yù ba le ti'i'ya chî betsá'lu'a' ttu cua'ya nuá loti' gudua' lani le, à'hua hastaba annana rúna le qui'ni runi ba' luchar lani i'yetse' ca contrario.

2 Acca ya'ni qui'ni Cristua nna runne fuerza para espíritu qui' le, à'hua por la' tsi'ilatsi' qui'e lani le nna runi le nu rú'u latsi'e, à'hua tulidàba dua Espíritu Santo lo loto' le, à'hua hua nabíá'ni le bi'ya nua' la' retúalatsi' qui' Cristua nna la' tsi'ilatsi' qui'e nna. ²Canchu chî nabíá'ni le ca così, pues hua yua' qui'ni chî nabíá'ni le cã. Acca liguni nu ná tsè', para qui'ni edacca' latsi' lóstu'a' adí. Ccá ttuba la' rulábalatsi' qui' le, à'hua guni tratar luetsi le lani la' tsi'ilatsi', à'hua tsé'e

le de acuerdo tulidàba lani ttuba propósito. ³Bittu gudua iquia le puro taá bi'ya interés ni qui' le nihua para qui'ni gudàliani adí ca hermano le, sino ántesla ccá le enne' yénlatsi' nna ccani ttu ttu tsa le qui'ni adiru dacca' attu hermano qui' le ti'chu lebi'ì. ⁴Bittu gulaba latsi' le tsua' tèruba nu cca qui' la'a lebi'ì ba para guni le aprovechar, sino ttu ttu tsa le nna ccálani le nùyue qui' adí ca enne' qui'ni riquina' huani cã nu ná tsè'. ⁵La' rulabalatsi' qui' le nna ná qui'ni ccá ti'ba uccua la' rulábalatsi' qui' Cristo Jesús: ⁶Pues lee nna uccuee tulappa ba lani Tata Dios desdeba neru, pero álahua por nuá nna calatsi'e egà'nee le' yíabara' nna quée tulappa lani Tata Dios. ⁷Iyaba nu née yíabara' nna bethà'na lée na de bitée yétsiloyu nna gulie nna bi'yenie tì'a ri'u nna benie servir ca enne'. ⁸À'hua de ga'nee lani cuerpo ti'ba ri'u enne' nna, yala enne' yénlatsi' uccuee para gunie obedecer hasta gütie para ri'u, masqui'ba uccuã ttu la' rettu'ló para lee de guttie lo curutsia. ⁹Acca por nùì nna beni Tata Dios ne honrar nna betie làtsi' né'e itute poder para qui'ni quée nubeyu' nu adiru dacca' ti'chu iyábani. ¹⁰Para qui'ni iyate canu tse'e yíabara', à'hua iyate canu tse'e yétsiloyu, hasta iyate nu yu'u le' infierno nna guni cã reconocer qui'ni lee nna té itute poder qui'e nna gudu yíbi qui' ru'a lúe. ¹¹Pues iyá'ya tènì cã guni cã reconocer nna ina cã qui'ni Jesucristua nna née Señor lo iyáteni, làniana thaliani Dios Padrea adí.

¹²Acca lebi'ì hermanos to' quia', ti'ba runi ba le seguir iyate ca

enseñanza quia' canchu chì rí'a' làni le, a'ba dani le guni le màsqui'ba canchu chi nútua' té lani le, liúdua iquua le de nu cca qui' salvación qui' le para qui'ni guni le cumplir itute nu ná qui'ni guni le, pero lani ttu losto' yénlatsi' nna la' rátsilatsi' nna. ¹³Por la' huacca qui' Tata Dios lani le, acca calatsi' le nu rú'u latsi'e nna runie le cualàni para guni li a. ¹⁴Acca liguni iyate nu calàtsi' Tata Dios, pero alàa ttu a la fuerza bá, nihua bittu quila le pleito, sino tsé'e le lani la' redaca'latsi'. ¹⁵Làniana nú ttu tehuá nuŷa etselániq biŷa falta contra le. Ccá le enne' losto' nàri ti'ba dani ca enne' qui' Tata Dios guni ca, para qui'ni làa cu'u le falta de tsè'e le le' yétsiloyuŷ entre ca enne' canu chi bethà'na ca ca mandamiento qui' Tata Dios porqui'ni le' la' riyeni qui' qui' nna labiru la' rulábalatsi' tsè' té. Tì'a ca belia tsàa yìabara' rudàni' ca le' chul-la nna, pues a'hua la' labàni qui' le nna daniq ccá ejemplo tsè' tì'a ttu la' yani' para lani ca enne' canu ga'na ca le' chul-la. ¹⁶Anía ccá le de runi le ca enne' ofrecer ca titsa' nu runna la' labàni. Làniana canchu chi íl-lani Cristua nna yala edacca'ni látsa'a' de ccá' saber qui'ni álahua ná' tì'a ttu deportista nu labí beni gana competencia, pues ántes la nu benia' entre lebi'ŷ nna yala tsè' birialàni ya' a. ¹⁷Lani gusto gattia' canchu caduel-la' para gunia' le cualàni de runi le voluntad qui' Tata Dios por fe nu té qui' le lani e. Canchu anía modo runia' le servir nna, entonces yala redacca' látsa'a', porqui'ni yua' qui'ni edacca' hua latsi' iyaba le.

¹⁸Acca lédacca' huani latsi' losto' le annana, lani là'a mísmuba la' redacca' latsi' nu té quia'.

¹⁹Rulaba látsa'a' qui'ni cuantu taá gunna Señor lo neda nna, entonces ithel-la' tabá' hermano qui' ri'u Timoteo itá bi tanèl-le' bi le, para qui'ni canchu chi eyequua bi nna entonces ccaŷen látsa'a' qui'ni tsè'ba tsè'e le de quixá'ani bi inte' nu cca qui' le. ²⁰Porqui'ni làteruba Timoteo ccani bi tì'teni cca te', acca huá lígani yala hua calàtsi' bi qui'ni guni le aprovechar nu ná tsè' para la' labàni qui' le. ²¹Pues iyaba adí ca hermano nì nna rulaba latsi' qui' puro nu cca qui' ba qui' para guni ca aprovechar por la'a mísmuba lacq, pero labí nùyue du tí' ca nu cca qui' tsina qui' Cristo Jesús. ²²Pero lebi'ŷ nna chía yù le qui'ni Timoteo nna yala lani itúteni latsi' bi runi bi inte' cualàni lo tsina qui' Señor de riquixá'a tu' evangelio, pues ná bi para inte' tì'a ttu yì'ni nu yala cualàni runia' tàta qui'ŷ. ²³Cuantu taá cca'a' saber tì'lŷa la irialània' lani ca asunto quíyí'ŷ nna, làniana ithel-la' taá' bi làti tsè'e le. ²⁴Rappa hua' confianza qui'ni Señor nna ithàlia huée lo neda quia' para itá' prontu taá làti tsè'e le. ²⁵Pero cca huá te' qui'ni ná duel-la' ithel-la' hua' hermano Epafrodito; làbi nna yala compañero tsè' ná bi quia' de runi tu' Señor servir, a'hua de runi tu' luchar contra canu redúdítsi nu ra lo titsa' lígani. Làhua bi nùq' guthèl-la' lani le nu riquina' te' nna, ²⁶yala chì calàtsi' bi ilá'ni bi iyaba le attu, a'hua yala nùyue ccani bi por lebi'ŷ porqui'ni bina le qui'ni fuerte gani hui'ni bi. ²⁷Hua liba

fuerte ni huì'ni bi, áti'tó' taá làa gútti bi, pero quiyáru Tata Dios porqui'ni betúa latsi'e bi, aláa tsua' tètuba làbi sino hàstaba inte' betúa hua latsi'e. Porqui'ni cáalá gútti bi nna, entonces adí ttérlani ehúini' te'. ²⁸Por nui nna redacca' ba te' rithél-la'a' bi làti tsè'e le, para qui'ni canchu chì etsa' bi le nna edácca'ni latsi' le de rilá'ni le bi attu, a'hua para qui'ni inte' nna bittuúru nùyue cca te'. ²⁹Acca ttu favor qui' le nna, liguni bi tsè' recibir lani la' redácca'latsi', porqui'ni ná bi ttu hermano qui' ri'u le' familia qui' Señor. A'hua dàni le gata' ttu la' tsì'ilatsi' lo losto' le lani bi a'hua lani iyaba adí ca enne' nu cca ca merecer ti'ba làbi. ³⁰Yà qui'ni Epafrodito nna adila apreciar beni bi nu cca qui' tsina qui' Cristua ti'chu là'a mísmuba la' labàni qui' bi, hasta qui'ni áti'tó' taá làa gútti bi de beni bi inte' cualàni lo ca tsina nu labí uccua posible qui'ni guni li a, pues lanú le té ni.

3 Annana hermanos to' quia', liúlue' qui'ni te la' redácca'latsi' lo losto' le ya'ni qui'ni chì ná le enne' qui' Señor. Nu cca parte quia' nna bihua rititsi' té' gudiania' le attu nu chàa bediania' le, pues ná bā para bien qui' le. ²Lihue' cuidado qui'ni nu yetse' ca calatsi' qui' guni ca contra nu ná lí, ná ca tì'a ca beccu' nu rèl-la'lana, pues lani la' ruthacca'yí nna calatsi' qui' ichu ca láti le para guni le cumplir costumbre de circuncisión nu té qui' qui'. ³Pero ri'u nna chía té marca lígani de circuncisión qui' ri'u, quiere decir, chì runi ri'u Tata Dios adorar lani espíritu qui' ri'u,

pues por Cristo Jesús nna redácca' latsi' ri'u. Álahua redácca' latsi' ri'u por biya costumbre, niti'to' labí ríalatsi' ri'u qui' canu rena qui'ni ná due'la' guni ri'u ca ceremonia nna ca costumbre nna para gata' salvación qui' ri'u. ⁴Pues a'hua inte' caalá calátsa'a' nna huacca hua te' gappa' confianza lani ca costumbre religiosa para gata' salvación quia', porqui'ni lanú attu enne' cca merecer adiru ti'chu inte' para gappa' confianza lani ca cosa'. ⁵Por ejemplo, xunu' ubitsa ruba te' uccua' circuncidar. Ná' enne' Israel, descendiente qui' Benjamín enne' gùdua tiempo antigua, a'hua ná' enne' de raza hebreo desdeba gùlia', a'hua ca ta' tàta quia' nna uccua cabi enne' hebreo. De nu cca qui' ley nu té qui' intu' ca enne' hebreo nna, pues tsè'ni benia' seguir doctrina qui' religión fariseo. ⁶Yala fuerte benia' defender religión quia' hasta qui'ni betsía látsa'a' ca enne' beni formar iglesia qui' Cristua. De nu cca qui' la' labani nàri según nu ra lo ley qui' Moisés, pues lanú nuya betseláni biya falta ni contra inte'. ⁷Pero iyaba ca cosa nu belaba látsa'a' ttu cuaña nuá qui'ni yala dacca' ca para inte', pero annana rilá' te' ca tì'a ttu cosa nu labí dacca', porqui'ni annana chì té confianza quia' lani lateruba Cristua para salvación quia'. ⁸Alàa solamente por ca nua', sino hàstaba iyaba bíyaru té quia' nna pues runi cuenta látsa'a' qui'ni labiru dacca' ca, porqui'ni chì nabia' te' enne' ná tsè' gani, es decir Cristo Jesús enne' ná Señor quiya'a. Chi runia' Cristua servir, acca chì bettsé'e

látsa'a' iyaba ca cosa nu belaba látsa'a' qui'ni dacca' çà para inte', pues annana runi cuenta látsa'a' qui'ni ná çà tì'a yîyi nu riru'na ri'u. Todo es qui'ni gunia' Cristua seguir nna, ⁹ccá' completamente ttuba lani e. Labiru rulaba látsa'a' qui'ni ná' enne' tsè' para iria nària' ru'a lo Tata Dios por medio de gunia' nu ra lo ley qui' Moisés, sino por medio de fe nu té quia' lani Cristo Jesús nna acca chî biria nàri'a' ru'alo Tata Dios, es decir chî bennee salvación quia' porqui'ni ria látsa'a'. ¹⁰Pero nu adiru calátsa'a' es qui'ni gunibí'a' Jesucristua adiru tsè', a'hua la' huacca qui'e para la' labani quia' annana tì'a la' huacca qui'e loti' beyáthee de lo lu'utia nna, para qui'ni cca' saber biya nua' cca' sufrir lani lèe nna ga'na' dispuesto gattia' ti'ba lee, ¹¹para qui'ni canchu chî echitha Tata Dios cabi de lo lu'uti nna thúa hua' lani cabi.

¹²Pero álahua nia' qui'ni chî nábía' te' ti'iya ná itute la' huacca qui'e lani la' labani quia', a'hua labí chî runia' itute tì'a calatsi' Tata Dios, pero runia' seguir lani itute látsa'a' para qui'ni ccá' tì'a calatsi' Cristo Jesús enne' bedilèe inte'. ¹³Hermanos to' quia', bihua rulaba látsa'a' qui'ni chî ná' tsè' gani tì'a calatsi'e qui'ni ccá', pero nu runia' duel-la' es qui'ni: bítturu gulaba látsa'a' de nu chî uccua, sino gunia' seguir lani itute fuerza quia' por nu chî' da'la. ¹⁴Ti'ba ttu deportista yala duel-la' runia' para gunia' gana premio, a'hua inte' nna hue'él-la' látsa'a' gunia' voluntad qui' Tata Dios enne' gutâyie inte', para qui'ni gunia' recibir premio nu ná preparado yiabara' para canu ná

çà ttuba lani Cristo Jesús. ¹⁵Iyaba ri'u canu chî ná ri'u creyente tsittsi lani Señor nna dani ri'u gulaba latsi' ri'u a' nna guni ri'u seguir lani itute latsi' ri'u. Canchu nuya le rulaba latsi' le yètsi' la ti'chu nu níyi'i, pues Tata Dios nna gunie qui'ni ttelini le qui'ni hua ná tsè' nu chi pá'a' le. ¹⁶Pero dani ri'u gulaba tsè' latsi' ri'u nna guni ri'u seguir tsè' de acuerdo lani nu chi beni ri'u. ¹⁷Lebi'i ca hermano quia', liguni seguir tì'a runia', a'hua liguni seguir ca cosa nu runi nu ná tsè' tì'a chî bila'ni le runi tu' portar. ¹⁸Iyé vuelta ba chh gutixa'ánia' le qui'ni por conducto mal qui' nuyetse' çà nna rulue' qui'ni labí ría latsi' qui' bíyaloni'a' qui'ni acca gùtti Cristua lo curutsia, sino ná la çà contrario qui'e. Acca annana de rinenia' le nui ribetsinia' porqui'ni yala rehuini' te' por mal nu runi çà. ¹⁹Pues lacà nna etenel-lé'ni çà lo yi' bél-la, porqui'ni en lugar de guni çà Tata Dios adorar, pues adiru runi çà según nu rú'ulatsi' cuerpo qui' qui' nna rebàta' çà por ca mal nu runi çà en vez de éttu'ni çà; puro ca cosa qui' yétsiloyu ba rulaba latsi' qui'. ²⁰Pero ri'u nna hua té derecho qui' ri'u le' yiabara', acca ribeda ri'u qui'ni de yiabara' la íl-lani Xana' Ri'u Jesucristua enne' gudilèe ri'u. ²¹Lee nna gútsiánie cuerpo débil qui' ri'u' para ccá' tì' tení cuerpo de la' yani' qui'e. Iyaba nù nna ccá' por la' huacca yení qui'e para gunie qui'ni iyaba nu té nna guni çà reconocer qui'ni lèe nna té itute poder làtsi' né'e.

4 Lebi'i hermanos to' quia' nu catsi'í te', yala calátsa' ilá' te' le attu porqui'ni yala la'

redacca'latsi' té lo lóstu'a' por lebi'í, a'hua ná le ttu corona nu runna Señor quia'. Liguni seguir ccá le fiel lani Señor qui' ri'ua, iyaba lebi'í nu yala catsi'í te'. ²Nì rinenia' ca hermana qui' ri'u Evodia a'hua Síntique, ttu favor qui' le eyacca tsè' le porqui'ni a' dani ca creyente guni ca. ³A'hua lu' hermano compañero tsè' lo tsina qui' Señor, rinábania' lu' qui'ni guni lu' cualani ca hermana qui' ri'ua', porqui'ni a'hua lacá nna guts'e hua ca lado quia' de benia' predicar titsa' nu runna salvación loti' Clemente lani adí cabi nna beni hua cabi inte' cualani. Nombre qui' cabi nna tsia hua ca lo libro qui' Tata Dios lati tsà láa iyaba canu té la' labani nu labí ttíq qui' quí. ⁴Edacca' latsi' losto' le tulidàba ya'ni qui'ni chì ná le ttuba lani Señor. Attu vuelta nia' le: Liúlue' qui'ni te la' redacca'latsi' lo losto' le. ⁵Ná qui'ni gulue' le nu ná tsè' según ba condición qui' ttu ttu enne'. A' modo nna gappa ca le confianza qui'ni ná lé enne' de losto' tsè'. Chì debiga' tsá íl·lani Señor attu. ⁶Bittu gulaba xàttaga latsi' le por biya, sino línabani Tata Dios lani oración por iyaba nu riquína'ni le nna hué' lí e gracia tulidàba. ⁷Laniana Tata Dios nna gunnee la' yēni lo losto' le para qui'ni làa gulaba thùtiga latsi' le, ya'ni qui'ni chì ná le ttuba lani Cristo Jesús; pues por la' yēni nu runna Tata Dios lo losto' ri'u, fácil ba ná para egà'na ri'u conforme masqui'ba labí ritelíni ri'u.

⁸Por último nna hermanos, rinénia' le qui'ni gulaba la latsi' le ca cosa nu ná ttùba lani nu ná li, ca cosa nu cca merecer qui'ni guni le

ca apreciar, ca cosa tsè' nna nàri nna según nu ra Tata Dios, a'hua ca cosa nu rulue' la' tsi'ilatsi' lani ca enne', iyaba nu ná qui'ni inne le tsè' qui' quí, a'hua iyaba capacidad tsè' nu té qui' ca enne', a'hua iyaba nu cca merecer qui'ni gudàliani le ca, pues acerca de ca cosa' nna ná qui'ni gulaba latsi' le. ⁹Liguni iyate ca enseñanza nu chì belué'nia' le a'hua nu chì bethéte'nia' le según nu chì biyénini le gunni'a' a'hua según nu chì bila'ni le benia', làniana Tata Dios enne' runne la' yēni qui' ri'u nna thúe lani le tulidàba.

¹⁰Yala la' redacca'latsi' runna Señor lo lóstu'a' porqui'ni lebi'í nna chì rexa latsi' le inte' nna chì guthèl·la' le cualani quia' attu vuelta. Alahua qui'ni biyùl·lani le inte', pero labí guppa le neda para guni le inte' cualani hasta annana. ¹¹Alahua biya nia' para ccani le qui'ni yala la' dí' rítia', porqui'ni chi nabia' te' ti'iya modo ca'a' conforme lani la' redacca'latsi' tsáliaya té quia'. ¹²Hua nabia' ba te' biya nua' tté ri'u la' dí', hua nabia' hua te' biya nua' gata' iyēni qui' ri'u. Pues chía bidèti'a' eyà'na' conforme lani ti'iya tediba ná la' ritè quia': tsá ro yélia bá' o tsá reya'na bá' sin go, a'hua canchu chì té tse'e ba quia' Ìle, o canchu bittu tení té quia' Ìle. ¹³Huacca ba te' gunia' iyaba ca cosa por medio de Cristo enne' runna fuerza quia'. ¹⁴Pero quiyará' le porqui'ni bexa latsi' le inte' nna beni le inte' cualani porqui'ni hualigani yala necesidad gutía'. ¹⁵Lebi'í ca enne' Filipos, hua yù ba le qui'ni bitola de gutixa'á' ca titsa'

de salvación entre lebi'ij por primera vez, làniana birí'a' le' región qui' le Macedonia, pero lateruba lebi'ij benna le ofrenda quia', anía modo belue' le gratitud nu té lo losto' le por cualani nu beni le recibir por medio de predicación quia'. ¹⁶A'hua hàstaba loti' chì ri'a' le' yétsi Tesalónica nna, guthèl·la' le cualani quia', alaárula tsa teruba sino hàstaba chuppa vuelta guthèl·la' le nu riquina' te'. ¹⁷Ruréxa'a' latsi' le nùì álahua porqui'ni calátsa'a' biỹa gunna le quia', sino calátsa'a' qui'ni gata'ni le ca bendición nu runna Tata Dios qui' canu ãa rute ba ca para tsina qui'e. ¹⁸Por medio de cartij nna, riquixa'ánia' le qui'ni chìa guỹia' nu guthèl·la' le quia' lani hermano Epafrodito, iỹenini chì té quia' annana, pues chì té tse'éní quia' por ofrenda nu benna le quia'. A'hua Tata Dios nna yala

redacca' huanie por sacrificiuj.

¹⁹Hua yùli rània' qui'ni lee nna ithèl·le'e iyate nu riquina'ni le de iyaba ca riqueza iỹenini nu tenie para lébi'ij, por nu beni Cristo Jesús para ri'u. ²⁰Dios Padrea nna née Tàta qui' iyaba ri'u, acca gudàliani ri'u e tulidàba, quíỹaru e.

²¹Lani nombre qui' Cristo Jesús nna liguni tsate' saludar iyaba ca creyente qui'e. Ca hermanos tse'e nì lani inte' nna rithel·la' hua cabi la' rinàba titsa' qui' le. ²²A'hua iyaba adí ca hermano canu tse'e ca nì nna rithel·la' hua cabi la' rinàba titsa' qui' le. Principalmente ca enne' ría latsi' entre iyaba canu runi tsina le' palacio qui' César enne' rigú'ubia' itute país romano nna, rithel·la' hua cabi saludo qui' le. ²³Xana' Ri'u Jesucristua nna gunie iyaba le bendecir.

A' bá ná.